

Dr. M: Ada pegawai badan berkanun tak dapat laksana DEB

U.M. 10 SEP 1979

KUALA LUMPUR 9 Sept. — Terdapat pegawai-pegawai dalam badan-badan berkanun yang tidak dapat melaksanakan Dasar Ekonomi Baru kerana mereka tidak tahu tentang tanggungjawab masing-masing, Datuk Sri Dr. Mahathir Mohamad, mendedahkan hari ini.

"Secara ikhlas saya menyebut umpamanya seseorang ahli perniagaan bila diberi jawatan dalam badan-badan ini menjadi lupa dan tidak tahu apa yang hendak dibuat.

"Ini berlaku walaupun di masa lalu merekalah orangnya yang mendesak

dan memberi berbagai cadangan kepada kerajaan," tegas Timbalan Perdana Menteri ketika merasmikan seminar 'Penglibatan dan Penyertaan Bumiputera Dalam Sektor Perlombongan', di sini.

Menurut beliau, bila berada di tempat yang mereka diberi kuasa, orang-orang ini mengamalkan sikap 'mengapa kita mesti tolong dia, sedangkan kita boleh tolong diri sendiri' apabila menerima sesuatu permohonan dari bumiputera.

Datuk Sri Dr. Mahathir yang juga Menteri Perdagangan dan Perindustrian, menegaskan, Kerajaan Pusat dan negeri berkali-

kali menasihatkan badan-badan tersebut supaya menolong bumiputera dalam bidang-bidang yang dipohonnya bukan mengambil alih bidang itu.

Nyeleweng

Terdahulunya beliau mendedahkan adanya penyelewengan yang dilakukan oleh orang-orang yang tahu menggunakan nama-nama 'bumiputera' bagi merebut peluang-peluang yang ada di bawah Dasar Ekonomi Baru.

Di samping itu terdapat juga bumiputera

yang sanggup menjual nama 'bumiputera' kepada orang-orang yang tahu menggunakannya.

"Ini adalah kenyataan dan ini juga menjadikan kerajaan-kerajaan negeri enggan meluluskan sesuatu permohonan yang berkaitan dengan satu-satu urusan perniagaan," tegasnya.

Katanya, kerajaan menghadapi masalah dalam usaha melaksanakan Dasar Ekonomi Baru.

"Dasar Ekonomi Baru tidak mungkin berjaya jika bumiputera dibiarkan sendirian dan sebab itulah kerajaan menubuhkan agensi-

agensinya sendiri dan badan-badan berkanun," jelasnya.

Datuk Sri Dr. Mahathir juga berharap para pengusaha bukan bumiputera supaya jangan memilih bumiputera yang malas dan tidak tahu bekerja.

"Kita menggalakkan usahasama seperti itu, tapi biarlah dengan orang-orang yang boleh bekerja supaya tidak satu pihak saja yang bekerja," terangnya.

Beliau menambah, selain dari kemampuan, pengalaman dan kecekapan adalah perlu dalam usaha memajukan satu-satu bidang seperti perlombongan yang disertai oleh bumiputera. Seminar sehari adalah dianjurkan oleh Dewan Perlombongan Bumiputera Malaysia.